

7. april 2014

UPA 2014/111
Evelyn Frederiksen

Nunatsinni innarluutilinnik sullissisuusut ilinniagaqarnissamut piginnaangorsarnissamullu pisariaqartitaat aallaavigalugit Naalakkersuisut iliuusissamik suliasmullu piareersaasiamik innarluutilinnik sullissinermi piginnaangorsarnissamut pisariaqartitat tamakkiisumik pigilernissaannut tikkuussisunik UPA 2015-mut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Ruth Heilmann, Siumut)

Siumup anguniarpaa innarluutilinnik sullissinermi sulisuusut sulinerminni atugaasa pitsaasumik aqqtissiuuttuarneqarnissaat sullissisuusut ilinniartitaanerat kommuunit susasaqartullu peqatigalugit aqqtissiuuttuarneqassasoq.

Inatsisartunut ilaasortaq Ruth Heilmann qutsaviginiarparput innarluutilit sullinneqarneranni sulisuusut ilinniarsimagunik ilinniagaqarsimagikkaluarunilluunit pikkorissarnissamut periarfissaasa pitsaanerunissaat aqqtissiukkumallugu siunnersuuteqarneranut.

Siumumiit siunnersuuteqartoq isumaqatigaarput innarluutilit sullinneqarneranni sulisuusut ilinniarsimagikkaluarlutik amerlasuut sulisuummata pikkorissarneqarnissamullu pisariaqartitsisoqartuarmat periarfissallu pikkorissarnissamut ataavartuusariaqartut Siumut isumaqarpoq.

Innarluutilinnik sullissinermi pingaaruteqarpoq sulisuusut suliffimminnut nuannarinnittut pikkorissarnissamullu periarfissaqartinneqarunik aalajaatsumik sulisinnaasut ataavartumik piginissaat, Siumumi ilisimavarput innarluutilinnik sulisorpassuaqarmat sullitaminnut tunniusimallutik sullissisunik naak ilinniartitaanikkut annertunerusumik periarfissinneqangikkaluarlutik. Siumut isumaqarpoq pikkorissarnikkut periarfissaqartinneqartariaqartut ingerlariaqqiffiusinnaasunik suliasmami ilaatigut oqimaassinnaasumi ataavartumik suliinnarsinnaanissamut ilinniartitaanikkut pikkorissarnikkullu neqeroorutaasinnaasut amerlanerusariaqartut, tamannami tamatta naatsorsuutigisinnaavarput qanoq kinguneqarsinnaasoq sullinneqartunut toqqisisimaneq sulisuusunut aamma ineriartoqqinnissamut nalunagu periarfissaqarluni tamatigut sulinermi kajungernermet annertuumik kivitsisussaammat.

Nalunngilarput tamanna aamma aningaasatigut kinguneqartussaammat aningaasatigulli kingunissai kisiisa isigalugit aalajagiiniarnissaq isumaqanngilagut isumatusaarnerussasoq pikkorissarnerit sullitanut sulititsisunut pisortanilu inatsisitigut pisussaafiliisut tamatigut pikkorissarnernik neqerooruteqarfigneqarsinnaaneri sullinneqartussanut innarluutilit sullinneqarnerminni pitsaasumik sulissuneqarnissaminnut pisinnaatitaaffeqarmata.

Siumumiit siunnersuuteqartoq tamakkiisumik taperserparput suliarlu Ilinniartitaanermut Ilageeqarnermut Kultureqarnermullu Ataatsimiititaliamut innersuullugu.